



Ref:

**Bodik ba : Presidente Conselho de Imprensa (CI)
Virgílio da Silva Guterres**

**Cc : Xefe Casa Civil,
Francisco Maria Vasconcelhos**

**Asuntu: Protestu kontra impedimentu jornalista nian ba asesu informasaun iha
Palásiu Prezidénsia**

Ho respeito,

Lihusi karta conjunta ne'e, Asosiasaun Jornalista Timor Lorosa'e (AJTL) no Timor-Leste Press Union (TLPU) nu'udar organizasaun mahon ba jornalista iha país demokrátiku ne'e hakarak tranzmite ninia lementasaun relasiona ho aktu balu ne'ebé ikus-ikus ne'e teri-netik jornalista sira ninia liberdade atu asesu ba evente sira iha Palásiu Prezidénsia Repúblika nian. Insidente foun-liu ne'ebé akontese iha Palásiu Prezidénsia mak impedimentu envolve pesoál balu hasoru jornalista sira ne'ebé halo kobertura ba Presidente Repúblika Francisco Guterres "Lu-Olo" nia diskursu ba nasaun sobre Estadu emerjénsia iha Sesta (27/3) relasiona ho propagasaun peste COVID-19. Aktu seluk ne'ebé pesoál sira iha Palásiu Prezidénsia Repúblika komete mak impedimentu hasoru jornalista bainhira halo kobertura ba enkontru líder istóriu nian ne'ebé lidera husi Presidente Repúblika iha 10 Feveireiru 2020 kona-ba solusaun ba impase polítika iha railaran. Tuir faktu iha tereñu, pesoál sira iha Palásiu Prezidénsia Repúblika fó-liu espasu no asesu ba média sosiál sira duke jornalista profisionál ka media mainstreaming sira hodi halo kobertura. Ho aktu hirak ne'e, média profisionál sira labele hakunu públiku ka sidadaun sira nia direitu atu asesu Presidente Repúblika nia mensajen ba nasaun ho direta no labele asesu ba rezultadu enkontru lider istóriu sira nian ho di'ak.

AJTL no TLPU haree katak situasaun no akontesimentu hirak ne'e la kontribui ba prósesu demokratizasaun, garantia transparénsia no boa governasaun iha país ne'e tamba impede média atu hala'o ninia papél informativu no papél kontrolu sosiál ho di'ak no efetivu. Aktu pesoál hirak ne'e kontra momós prinsípiu direitu demokrátiku, Konstituisaun Repúblika Demokrátika Timor-Leste, Artigu 40 no Artigu 41 no Konvensaun Internasionál kona-ba Direitu Sivil Polítika, Artigu 19 (the Article 19) no Lei Komunikaun Sosiál kona-ba liberdade imprensa no liberdade asesu

informasaun. Afinál direitu asesu ba informasaun ne'e nu'udar direitu báziku ema nian, entau jornalista no média iha obrigasaun legál no konstitusionál atu hakunu sidadaun hotu nia direitu hodi hetan informasaun loos no kredível. Bazeia ba jusifikasaun sira ne'e, AJTL no TLPU hakarak rekomenda ba Conselho Imprensa atu:

- Fó samada atensaun ba Gabinete Prezidénsia Repúblika atu fó espasu adekuadu no asesu livre ba média no jornalista sira atu halo kobertura ba kualker eventu ka atividade presidente repúblika nian iha futuru.
- Komunika ho Gabinete Prezidénsia repúblika atu harii relasaun no komunikasaun di'ak ho jornalista sira no média bainhira deit sira halo kobertura iha area Palásiu Prezidénsia Repúblika nian.
- Komunika ho Gabinete Palásiu Presidente Repúblika atu respeita jurnalizmu no liberdade imprensa iha Timor-Leste tamba demokrasia so eziste de'it iha país sira ne'ebé ninia média no jornalista sira livre husi kualker presaun no impedimentu.

Binhira Gabinete Prezidénsia Repúblika la hakunu ezijénsia sira ne'ebé temi iha leten, AJTL no TLPU sei halo asaun seluk mak hanesaun temi tuir-mai:


- Sei haruka jornalista no meu komunikasaun sosiál hotuhotu atu labele halo kobertura ba atividade saida deit mak Palásiu Prezidénsia realiza [iha relasaun ho presidente repúblika nina deklarasaun ofisiál sira](#).
- Sei prosesa pesoál sira iha Palásiu Prezidénsia Repúblika tuir Lei Komunikasaun Sosiál, Artigu 41 kona-ba atentadu ba liberdade informasaun iha espasu públiku tamba ida-ne'e nu'udar aktu ameasa hasoru liberdade imprensa no liberdade espresaun iha railaran.

Mak ne'e deit karta protestu ne'e ami halo, ba kolaborasaun di'ak no prontidaun, la haluha ami hato'o obrigadu barak.

Dili 1 Abril 2020



Zevonia Fernandes Viera
Presidente AJTL



Manuel Pinto
Presidente TLPU